

Frantzia Rhone eskualdeko presidentearen aukeraketa

Eskualdeko presidente berriak ezkerrekoei zor die aukeraketa

Saio gogor eta nahasi batetik erabat zatikatua irten da eskuina

Allande Sokarros / Maule

Bi egun eta bi gau iraun duen nahasketa eta tentsio giroko saio baten amaieran, Anne-Marie Comparini (UDF) da Rhone eskualdeko presidente aukeratua izan. Izendatze hori zor dio ezkerreko batasunak bere alde egin dako jarrerari, baina, aldi, berean, eskuineko indarrak erabat zatikatu ta geratu dira, eta baliteke egoera horrek kudeatzina den Eskualde Kontseilu bat utz dezan.



MICHEL GÄNGEN / EPA

Le Penek gidatutako FNa guztiz zatitu zen bozketan.

ATZO goizeko 3:00ak ziren, saioburuak hirugarren bozkaldiko emaitzak aldarrikatu zituelarik. Anne-Marie Comparini UDFkoak Rhone Eskualde Kontseiluko 157 hautetsietatik 75en botoak bereganatu zituen eta, beraz, gehiengo sinplea nahikoa zenez, eskualdeko presidente aukeratua geratu zen. Haa-tik, hautaketa honen berria eskuineko RPR eta Demokrazia Liberal (DL) alderdietako hautetsien oihu eta garrasien artean hartua izan zen, eta presidente aukeratu berriaren lehendabiziko hitzaldia halaber pasatu zen. Hirugarren eta azken bozkaldi horretan, ez zen eskuineko hautagairik lehiatu, eta aurreko bietan Jean-Jack Queyranne sozialista sustatu egin zuten 60 botoak Compariniren alde emanak izan ziren. Hortaz, UDFko hautagaiak, eskuineko 15 boz baino ez zituen bereganatu.

Beste boto gehienak RPRk eta DLk aurkezten zuten eta Charles Millon zein bere jarraitzaileek sustatzen zuten Pierre Gasconengan joan ziren, honek 56 boz jaso baitzituen. Patrice Abeille Saboia herrialdeko independentistak boto bat izan zuen eta hiru zuri bozkatze zenbatu ziren. Azpimarratu behar da ere, Bruno Megreten aldeko FNko 22 hautetsiek ez zutela parte hartu azken bozkaldi horretan eta bai, aldiz, Le Penen jarraitzaile diren FNko beste 13 zinegotziek.

Ororen buru, beraz, eskuina eta mutur eskuina sekula baino zatikatuagoak irteten dira eskualde presidentearen

hautaketa horretatik. Azken batean, ezkerreko batasunak lortu du nahi nahi zuena, hots, eskuina bitan banatzea. Alde batetik, egon dira RPR, DL eta Le Penen aldeko

FNkoak Pierre Gasconen alde bozkatzeko «ezkerrarekin botoak ez nahasteko», eta, bestetik, «batasun errepublikanoa» osatu duten UDF eta ezkerreko hautetsiak.

Agintaritza osaketa zaila

ANNE-MARIE COMPARINIren hautaketak ez du gauza handirik konpondu Rhoneko egoera politiko nahasian. RPRk berehala jakinarazi zuen ez duela parte hartuko Eskualde Kontseiluko agintaritzan, eta ezkerreko batasunak, aldiz, hasieratik iragarri zuen, presidentzia lortu ezean, exekutiboa eskuinaren eskuetan utziko duela. Beraz, astelehen

honetan bertan aukeratzeko hasiko diren lehendakariordeen izendapenarentzat oso egoera zaila eta bihurritsuarekin topo egingo du Anne-Marie Comparini zentristak. Askoren ustetan, eskualdea ezingo da gisa horretan kudeatu eta ez da baztertzeko gaur egungo Kontseilua desegin dadin eta hauteskunde berriak antola daitezkeen.

Eskualde aberatsa

CHARLES MILLONEk galdu egin du, beraz, Presidentzia. Bere jarrera tematsua ulertzeko, jakin behar da Rhone eskualdea dela Frantziako bigarren eskualdea (Ile-de-Francen atzetik), aberastasunaren eta gizarte zein ekonomia baliabideen kontutik. Zortzi departamenduz osatutako eskualde honetan bizi dira 5,6 milioi lagun, eta ekonomiaz oso

garatua da, kimika, farmakuntza, metalurgia, elektronika eta goi-teknologiako enpresa ugari baitaude bertan. Rhonek Frantziako Barne Produktu Gordinaren %9,3 osatzen du, eta esportazioen %11,7 ziurtatzen ditu. Horiek guztiak horrela, Rhoneko Eskualde Kontseiluak 7,5 miliarreko aurrekontua kudeatu du 1998. urtean